

JUAN TOPÉETI CHÁCX CUIYÁIITIM AC

Juan Topete

Tix óahhiha

Óxah hin yói hímmaaz:

—¡Hamáax hip quij hacóxl! ¡Cuícquee zipocóoz isíssiixo!
¡Hánt ac cuáaix, hánt ac cuáaix! He xáa insitóij quéehi. Imám
chapáizi hapóomlajtax insíihhiit háahi. ¡Hánt ziqui cuín! ¡Hápi hiz
cuhíij! ¡Hazi haquééjim! ¡Hamáax quij hacóxl! Óxo tpacta xox xáa
mé hayitóij. Zaah cóox cah óoxo tpactama hánt chiti maz hatcaitajc
maz hatááxoj xox xáa mé hayitóij. Ipácta quih mocóaaha. Hápi to
compij haz intcuaquééjim.

Óx tpactama táao cohptijma hin yóaxoj.

Óx tpactama háaccoo xahxáii hacáin hant hapáhtolca toc tijma
án hamóii. Hacáin hant hapáhtoji an hatoima cuax hacáin hant
hapáhtoj quij ano ihptijma hin tááxojma hantípzx xah com it
ihptalin to cohpmíiitim. Cuícquee zo hácquiix imíih
xahpyóommooz. He hóoxo cázzooj xahpmíimmooz.

Óx ipácta hánt xah com iti hipánnoozxim iti cuícquee ti moca
hantípzx com itizaj yáit. Hantípzx ti moca itizaj toit hin táhho óxah
mée:

—¡Móhha Hiyasiin! Imám me ihsáhhiitim. Imám quih
cuámmiha. Hóinalca íyyaataj cuiyámtxö hiz ac conthássaataha.



Óx tpactama hatáammaati cuiyámtxöa hac conthámmaat. Haa inthíihhaat hatáammaati cuiyámtxö táax conthatat haa inthíihhaat iti hást quij íppaac tazquimma táax ano hatoima óol cop hax tmámmoma óol hip cop halxah xomám xah téé hax ta:


—¡Hant híij! Ihpapóccaalinta insíihhiit háahi.

Óx tpactama cóocj itapocalim hánt he yocáitax. Cóocj itapocalim hánt he tcaitaxma ihyóohhiit.

—Pac ihpapóccaalinta insíihhiit háahi. Óol híng cop halxah xomám. Tíx ihsíaaí háahi. Hápi xah to cuhij ihpaquééjim xah him míih.

Óx tpactama hapi xah to cohptij ihmaquééjim. Hax ihtaquééjimo hax yomáafpo hax yomáafpo. Óx ipácta hax imáafp hax imáafp to cuiihca iti cuçax záah quij ánnoo síizquin ta hant yóohca.

Óx tpactama zíz zo himáaha xo záah quij ánnoo síizquin tama xáaslca com hiháaotim iti xáasj quih táaccooj hax hánto tij toc tijma xáasj cop ítcoj tíix óox xáasj cop ítcoj tíx iti háyyoom. Óx tpactama zíz cuique cáii cuçam cóosting chisáaco ihyoficj. Ihtáppoox cohpmáoctim. Icózziimiha xo cohpyáoctim. Cohptáoctim hilít quij ano cohtacatx hitóit coi ano cohtailx hax ihpnééjo táax iti hámmoom.



Ox ipácta iti cuax hánt xah isfii himmíiha. Óx ompacta xo zix zo himáahaa yax zix zo himíixxiimihaa yax ihptíim ihptáiiima záah quij cólx tijma mos hánt ziqui ihpmíin. Hémmee quih xéppe íicp ac icp tahca haa cáahca xo táax iqui cuisquína hax cuiháii taax hoinalca íyyaataj cuiyámtxö táax conthámma. Hant ítting quih miihhaaha.. Ihmíihhaa zo to ccuihtax isihtaha. Cáamzilcaha. Zix ihmíihhaa háa icahíptiha xo him iháht itcuájijho.

Óx tpactama ihámmooc chícqúi cáanniing cop íipca cah hánt yofii. Ihámmooc chíppaac ac ccuáap cop ihámmooc chiqui yáacj cop. Íipca cah hánt imfii záah ccóó cop háx chípi hecot cotomma háx cop hipi iti cuhíimzo cah háx cohmuíssi. Zix zo himáhhiitiha xo imám com ihmíihhiit. Hax óóxo ihptpacta haa inthíihha iti cuax mos záah quij ánnoo yóozquim. Zix quíissaax zo himáhhooha.

Cuax yatáam hizéecp hast óosxöl hánt quih cuiyámtxö tí iti quíijihha. Hast héecque íyyaat cóoxp hapáh quih toc tijma cuiyámtxö táax conthámma. Táax conthíihha iti hást quij ícca xah tcailma háptco mos yohámmooc. Cuíccuee zimpáhhooha.

Congcáac chicp yáii chaa tahcamax ihtáixmax haa tahcax iti toox cuíihca haa chaa tahcax zép iti yáhhiitim ac óoxa hac cáahcaha. Congcáac coi hánso hóixiha. Íicp ac íc himíiniha. Zix zo ihpoa xéppe iqui ihpin to conthapax xéppée cong cohpsíifpaha xo zix isahíiha zo himáaha yax áamma. Hax yatáam iti cáahca chíicp ac iqui ihpmíin. Hé hánso cáttaaxiha.

Haa inthíihha iti záah quij ít cötij théetma xóop hax cáacoojo zo toc tapma ihtíiai ít cohptij ípca cop hant ícqúi tinma ihpmíittaax. Congcáac chicp yáii hac íicx ihpíihta xo congcaíi Sáara chimám itaai hiz cuqta xóop zo ihsfáin tama táax iti mota to cuqta hin táhhoo hin tíjic tóohha óxah méé:

—Hitquimáhhaaj. ¿Me áz iti cóhhaaya? ¿Xicca icot mihíih quih cócsar quih cóox hácx yamíhtajya? óxah hin yói.

—Cuíccuee zo hácx immíihhiha. Hé hánso hacx cóiitimiha, óxah ihmíi.

Óx tpactama hin tsácj hin yaháanpx. Haa intíihha iti cuax

hast héecquee chéel an icahémmee quih cuhatazcamma xíc^ucaa quih quíistox quih tát^uxo toc toima cuí^ucquee Ramón chiti míh^uhaa xah cuí^uque Comíito quih zíc^u aaquéect Pedro Róobles hapáh xah zíc^u cuí^uque cáii ctám cuí^ucquee Lois Huítzo chiti míh^uhaa xah taax cóoxo tá hac iti toi to cuóii. He héaz quij oyaccaalcamiha.

Óx tpactama óxah yázza:

—Taax cuí^uhca taax hast óosxöl ano cóii quih cócsar quih cóox hacx yamihtajiha, óxah méeyo.

Óx tpactama xíc^ucaa xah quih quíistox tanticat congcaac chisiyyaalang xah cáafcajc coi énm haxáazc ánxö itonec an iquixáazjojc cóccaalcang xah táax itonec hast óosxöl íicp ac hast ánc^uoj quij íicp ac ano tatocl imóoctam. Cáil com íicp ac cáitaj quih yáit chiep mopatta isiht ta tamöcö zíc^u ziyomáht. Zíc^u zitcuah^ut cuax^u hast óosxöl iti tazcam iyóoctam. Ítto tinej toc tahcama xaasj cáocla chíicp tá hac congcaac chiqui titóij xah téemyo.

Tpáncoj coox to conticcaatiha. Congcaac quih tixóaa^ujx hánt chitaitx cuí^ucquee quih cáttaax chánt chimáao táaxo cuimpáctaha. Tpáncoj coox hánt quih cáitiha. Tpáncojco háa mómmaat yax záah quij ihíij ac imáixa quihax cotama háptco tonáailc míizcam.

Tonáailc tázcamma cuax^u óxah mée:

—Taax cuí^uhca taax hánt pofita xaasj cáocla quih táax conthasóozziitojaha, óxah mée.

Óx tpactama cuí^ucquee Huítzo óxah imíi:

—Mé imposanj insacáattaaxaha, óxah imíi.

—Óx hapáctaha. Hé ihsacáattaaxaha, óxah mée.

Óx tpactama hin tsánj hax tama haa intháammaat. Hánt it hayáii hast óosxöl cuhatazc^uam hatóoctamma zic ínnaa quíoc^us ináil ihyáocting quih tahcáscax hóóxo tosotoj íij toitoj xaasj tí cop iti tih to cuí^uip. Óot ináil ihyáoctim mos tahcáscaxma hóóxo tosotoj íij toitoj xaasj tí cop iti míih. Tosni ináil ihyáocting quih mos énniing chano tahzam tahcáscaxma hóóxo tosotoj xaasj tí cop iti tih to cuí^uih hé hacx cuí^uih xah cámöcöih^uaa yax.

Óx tpactama zíc^u cuí^uque cáii ctám Jesus Féelics hapáh cuí^ucquee

Séelsa chiti míhhaa quij ihmíhhaalcan tanticat itóocta óxah yée:

—Xaasj cáocla chano toi haa cóiiha xahíi. Hánt hapacat ihíistox com itíi xah ponta hatcuálx. Hantáxl cáahcaha xaasj cáoclac.

Óx tpactama hánt hatocat to cuhatoima zix héhheet ccuúij zo toc tijma congcaíi Sáara chitáhho iyáazzi. Hantípx tí com háas hax tooilo hax tihíizzaatajoma háas quihíizzaat tá hac an hant toima zix cuique cáii ctám Jesús Féelics quih yámmaatox. Tóommaatox hax ta itahítaajcma zix hétteet ccuúij quij tpáfema tpátma hayóiiitoj. Íyyaas quih taax hayóiiitojii. Íyyaas quih tahmécqueetma tíx hataitojii cuáax íssooj quij tpatma hayacóxxaaj.

Hóo temex iti yahímöcö quih tahpájjoos yopácta. Tíijcx tísx óx yopácta. Óxah mée:

—Cuáax ihhaahi. Cuáax cuámmi hiz cuúij. Hápx ihscáaixaha. Xáa haa hapozcangx zix zo hasiitojaha xah mée.

Óx tpactama cuáax tá hac cuhíhíij ac hax ihyoqueepéaa. Xíccaa chocóaa coi tá hac ano toi haa cóiíhaa yax ánnoo hisíifp xah chaa tahcama.

Ox ipácta iti cuáax zix héhheet ccuúij quij hápx tijma hánt xah cõtahcápma itóozj quih tmám toc tihma hápx tihma híicp xah iyóoh congcaíi Sáarac.

—¡Cáhhiit cáhhiit! xah hin yóoh. Ihpímoox tá hapóiiitoj hapóox mámmaaz hasozíitaha. Mamáhhaaj mos haa quíijaha. Máitz mos haa quíijaha, mos óxah mée.

Óx tpactama cuáax ihyoqueeppe. Híihhoo xah quihax cohyáai. Óx tpactama zix héhheet ccuúij chinnool quih zo tahcápzx hé tahcozotma hantípx com it ihtihtim ihyóohhiitim. Hantípx com hax tihíizzaat tomma íttii xahptihtim ihtáhhiitim hé xah pozoj hingcuícqueetipi ihyomáa xo xíccaa ching ccáatang coi hácquiix haa tom hácx ihtmíih xah cámcöoiha.

Zix héhheet ccuúij quij témmee hax tama cuícquee Lois Huítzo chin yosánj. Hin tsánj hax tama haa intháammaat. Háx haa inthíihhaat iti cuáax hantípx xah zo to contitama iqui zaaj

hatpaailxma hantípzx con táaccooj to cotomma ícquii zaaj hampáailx.

Óx tpactama cuique cáii Jesús Féelics Sáara quih zix íhhaax ícx ihíih chantípzx com iqui zaaj hatpaailxma téenjma congcaác coi



tcóó híicp impáncojc. Cuax táax iti motat hícquii tpancojc hée tazcamma hax ihmáá cah hin texla ihmáá cah hin texlma táax conthatatma óxah móozza:

—Pohámmocta cóos zo to ccuijta cóila quih toc sóiiaha. Ox ipácta iti hánt pofita congcaác coi pac háa paita xéppce cong ccuahaixta móosni quih pac ipóocötoj ipóonneec ipóomlajc halx ánnaxö íimlajc isax Sáara quij tís ispéhheaha. Cösahippootaha.

Óx toza toc toima tooila ihámmooc cop iti toi tooila to cuiyáii caha mos ihít müictim. Sáara quij mos enm háacni zo cuahíppoot.

Tá iti cuihíyyaatiha.